

名

山

藏

名山藏卷之四十四

晉江何喬遠 撰

天毆記 上

陳友諒者沔陽漁家子父曾才弟友仁友貴友富友直友諒拳勇長伎角爲縣吏非其好也與友仁友貴聚衆爲羣盜元順帝十一年辛卯袁州慈化寺有僧瑩玉以彌勒佛教鼓動湖湘一本從者甚衆今刪麻城人鄒曾勝大唱其術羅田布賈徐壽輝浴鹽塘有毫光曾勝驚怪之共推爲主舉號紅巾攻陷蘄黃壽輝開蘄水爲蓮臺省建國天完改元治平以曾勝爲相黃陂人

倪文俊爲將文俊者亦故漁家子善兼行多槳船陷沒漢陽興國武昌安陸沔陽及江以西郡衆號百萬友諒舉聚應之壽輝隸之文俊戲下元人進攻壽輝破復其所陷郡縣文俊輒復之迎壽輝居之漢陽壽輝爲人縊緩不能主權而文俊驕恣欲圖之計不行奔黃友諒襲殺文俊併其軍自稱平章居於江州其時吳公起金陵二年矣友諒陷元池州公渡江首取太平郡則與池隣使常遇春率廖永安吳禎往攻破之戊戌春友諒陷元安慶使其將趙曾勝守焉曾勝者友諒驍將善雙刀號雙刀趙初結巢湖水軍以款

我已反歸友諒友諒陷元龍興瑞州遣曾勝自樅陽
攻我池太平將劉友仁與戰死是時友諒遣別將畧
下元邵武襄陽諸郡自以兵破吉安撫建昌贛汀信
寇衢取杉關矣其明年吳公使俞通海還救池曾勝
使將鈞守池自據樅陽水寨數往來寇掠太平青陽
石埭諸縣通海及張德勝攻其柵江營獲鈞大破之
遂以復池然終不能絕曾勝往來拒戰而俞廷玉攻
安慶死焉徐達乃與德勝及曾勝戰於浮山之陸追
斬其部將泰於潛山曾勝乃敗友諒聞曾勝敗怒罵
曰奴驕不力僞行安慶軍及鴈汭曾勝具蒸羊以迎

執殺之初友諒陷元龍興壽輝欲都之友諒不與壽輝不聽來自江州友諒佯出迎覆城西門盡殺其下卽居壽輝江州而自稱漢王其明年復率師寇池徐達常遇春敗之九華山斬首萬餘友諒不自得大率舟師十萬挾壽輝寇我太平殺守將花雲乃大快卽遣人白事壽輝前從後椎殺之因自立爲帝國號漢建元大義是日也殿采石之叢祠雨甚羣臣藉卉泐而拜遂以鄒魯勝爲太師張必先爲丞相張定邊爲太尉必先定邊亦驍將也漢人稱必先曰潑張友諒爲人貪忍有權術思致死一決則與張士誠約從而

東攻我建康士誠齷齪白固不敢應友諒則獨來時
我太平新爲友諒所併聞漢來皆匈匈公從劉基策
與決戰而遣胡大海搗其信州制漢後指揮康茂才
者雅游友諒公使爲僞書請降告之內應令分兵三
道入茂才如指使其門者致友諒書友諒見門者曰
故人也問起居曰康公安在曰屯江東之圯曰堅乎
曰木也友諒悅與之壺餐遣之而示之閒曰我來呼
康公會自漢逃者亦曰漢上問新河之道吳公乃
使李善長石江東圯下易其木宵而具使趙德勝跨
新河城焉使常遇春馮勝華高將帳前五翼軍伏石

灰山陽徐達軍南門楊璟軍大勝港張德勝朱虎軍
水軍龍江公總大軍軍盧龍山黃旌偃左赤幟偃右
曰搖赤幟則敵攻動黃旌而伏起友諒至果三其兵
自入大勝港楊璟禦之港狹不得舫舟退出大江衝
江東緒其圯石也且新河已設版矣呼康公無應者
諒知爲所賣趣之龍江萬人先之登岸植柵公擐甲
建羽葆親視士暑甚士汗如雨公偃蓋與同汗士欲
戰公相風口天且雨諸軍食少選西北之風狂雨甚
公搖赤幟諸軍奪岸拔柵友諒麾而戰雨收公動黃
旌鼓之石灰之伏出徐達張德勝朱虎皆集德勝從

中大呼大破之友諒遁而與其衆爭舟困於汐僅免
蓋斬及溺以二萬計俞通海追而火其舟慈湖又大
破之張德勝追之采石戰酣廖永忠大呼殺入華雲
龍躍馬擣其中堅王銘挺而進漢兵攢槊刺銘傷額
三周於陣又大破之德勝死周顯與漢戰觀渡橋亦
破之諸軍乘勝追擊守太平者遂破之漢降將志雄
曰漢併兵東無守安慶者可取也公使余元帥等取
之以趙仲中守焉志雄趙魯勝部將也怨友諒誘殺
魯勝故龍江之戰不鬪而降而大海信州之師亦捷
於靈溪公使大海子德濟守之於是漢門戶墮矣友

諒尋遣張定邊來攻安慶仲中走公曰仲中渡江舊人予不忍辟賜之弦曰弦懸也而納官其弟辛丑三月漢遣將李明道寇信州夏德潤與戰死於草坪漢阻玉山繆美馳而爭玉山德濟兵少僅嬰城守久之胡大海李文忠援至德濟開門延戰大破之王玉手明道及其宣慰王漢二公復其官使爲鄉導以取龍興亡何張定邊復來攻陷安慶安慶陷八月公親往征不下劉基曰江州漢巢穴也徑趨之公曰善引兵西距五里許友諒不能軍夜奔武昌追獲其玉研華蓋日月旂常公使徐達屯漢陽扼之康茂才等乘勝

破楚諸縣於是漢失江州其將吳宏以饒降王溥以
建昌降其明年胡廷瑞與其平章祝宗康泰以龍興
降公得龍興改曰洪都以葉琛爲知府使鄧愈與兄
子大都督文正守之於是乎漢失龍興其將歐魯勝
以袁隆曾萬中以吉安降彭特中以龍泉降而安慶
漢不能有矣友諒旣失龍興蹙蹙不得意思得一相
當則大作舟艦載其嫗屬百官以六十萬師空國自
武昌來其舟皆丹漆上下三級走馬爲棚板房爲蔽
艚頭裹鐵一舟數十癸卯四月傳雲梯蒙竹盾於洪
都城下晝夜攻撫州門墮者三十餘丈鄧愈與文正

殊死鬪且戰且城李繼先牛海龍趙國旺許圭朱潛
皆死趙德勝開門射殺其金指揮漢分遣其將陷臨
江吉安殺吉守將萬中執指揮粹中參政齊知府叔
華徇城下而疾力攻新城門薛顯突出銳卒斬其劉
平章擒其趙副樞謝成堅拒友諒寺步門獲其驍將
三漢復潰六月趙德勝巡城東門中漢伏弩死洪都
旦暮下文正遣捨命王詣漢約日降日以遠而使張
子明夜行見公及日至漢使來受降望見城上志皆
新遂縛捨命王殺城下會子明歸漢軍獲之湖口友
諒啗之曰若爲漢呼降貴若子明諾至城下漢嬰子

明背曰呼子明大呼曰賊使我呼諸公降我佯許之
幾得見諸公公今許我大軍至矣友諒怒以戟剄子
明子明死七月漢圍洪都八旬餘矣公親督舟師二
十餘萬應之乙酉次湖口丙戌友諒解圍出鄱陽湖
逆戰得其覘師之客曰吳徹試之詩奇之黥而放之
歸丁亥遇康郎山公乘白海分師十一戊子徐達當
先擊其前鋒獲一巨艘漢兵死者千五百餘人常遇
春等連艦大戰俞通海飛炬火其舟二十火反延達
舟達撲火更戰張定邊直前犯白海白海膠於沙漢
兵匝焉程國勝劒叱之與陳兆先大奮擊韓成曰事

急矣冠公冠衣公衣爲公也而投於湖吳舟之人釋
戈大哭漢人皆喜會遇春通海疾權來水洶洶遇春
射中定邊走之國勝遶後力攻與兆先皆死之通海
廖永忠飛翼追定邊定邊舟被矢百餘亡卒甚衆已
丑友諒自乘赤龍船悉其巨艘連鑪促戰曰赤厭白
漢旌旗樓櫓萃如也蟲姑也吳舟小仰攻多卻公手
旗麾之不前斫右隊長十不能止丁魯郎余昶陳弼
徐公輔皆死之魯郎身被十餘創首脫猶手兵若戰
郭子興曰舟實不敵火攻可日晡東北風甚怒常遇
春藥輦七艘火之焰漲天赭湖水友仁友貴及平章

陳會畧等皆在焚中庚寅友諒復力戰自辰至巳所
殺傷我過當礮之聲若雷臨首劉基侍忽大呼公
驚仄基揮袂連聲而呼公更舟公更舟公亟入他舟
顧視白海無不糜也公夜盡白其舟以誤漢人詰朝
大戰漢舟大上下不相聞卒死欲盡舵者尚呼櫓廖
永忠俞通海汪興祖趙庸乘飛翼六入鏖戰漢艘蔽
之若沒六翼方深入仰而殺漢兵戰旣酣瞥波出諸
將望之勇氣百倍呼聲動天地湖水盡立大敗漢人
日暮吳先航罌子口葦湖而軍友諒退保鞋山不得
夜吳泊左蠡漢泊渚磯相持者三日公貽漢書挑戰

漢不敢出殺所獲我士公察漢俘藥其傷遣之俞通海曰湖水多淺易黏舟扼之江據上流擒矣劉基曰移湖口以金木相犯日剋之必勝公從之駐南湖水陸營置火舟火筏中流扼漢旬有五日漢食盡掠餉都昌公兄子文正焚其舟大窘八月壬戌友諒欲突出湖口繞下流遁歸武昌常遇春與諸將還以火舟火筏追擊之聯比隨流自辰及酉力戰不休至涇江口我師復出擊之友諒迫啓牕視郭子興之矢集目貫顙友諒死友諒自稱帝迫死四年耳其初起也父告之汝一捕魚兒耳而欲圖大事友諒曰相塚者言

我家當富貴今其時及貴迎父父曰兒不守故業吾
懼及也張定邊及其子理載友諒屍夜奔武昌發喪
襲位改元德壽公振旅以赤舟載俘白舟乘士今之
畫舟之白地繇勝於鄱陽始也過湖浮屍蠢蠢公歎
曰噫士爲我死復之以梭繼三投之湖魂之憑者能
爲厲神其纜曰梭三舍人舟行禱焉十一月公征理
武昌柵其門以舟絕江而將屠之黥面之客復來見
試之詩又奇之命班師黥面客崇仁人吳徽也家貧
賓師鄱湖之戰遣徽開行覘我有縛以獻者上素聞
徽名釋徽縛使題天閣百馬圖徽應聲上詩曰問渠
何日渡江來百騎如雲盡鼓龍九十九中皆汗血當
頭一直是龍媒上奇之度其不爲我用乃刺詭譎秀

才四字於面遣之還友諒果惡之曰安有面如此可
爲賓師徹遂亡去友諒死陳理奔還武昌上忿其城
久不下將屠之忽軍門外有自稱詭譎秀才求見上
召入與語良久命題西山夜雨詩復進詩曰莫厭西
山夜雨多也應添起洞庭波東風宜與周郎便直上
金陵奏凱歌上會其意卽下令還建康而武昌得徹
乃更生上卽位物色之不得未幾聞忽歸家面邑瑩
然復出遊縉紳或以范增目之而多其豫識聖祖增
所不其明年諸將奉公爲王武昌尚未下復往征之
及公其明年諸將奉公爲王武昌尚未下復往征之
是時漢丞相張必先守岳州張定邊縋城往告必先
引兵去城二十里軍洪山王命遇春率兵五千擊之
必先大敗擒之王使縛示漢曰潑張我得矣漢氣大
索武昌城南高冠山俯城中可瞰也漢兵屯焉吳王
曰誰能奪此傅友德前趨之鏃出腦若脇友德棄腦

鏃抽脇金鼓而登奪之漢將陳同僉望見吳王之志
馳繫入帳下郭英從傍來王坐胡床疾呼郭四爲我
殺賊英躍馬奮臂同僉應槍倒吳王悅衣四以其錦
袍居數日王使漢故降將羅復仁往招諭復仁曰主
上不忍廢漢而使臣招必陳氏之孤得保首領而臣
不食言臣雖死不憾王曰吾力非不能得漢頓兵而

待念民耳復仁號漢城下

羅復仁吉水人深易學善詞賦從陳友諒不樂爲用

太祖至九江投身來歸命侍左右親信之既從破友諒於彭蠡命齋蠟書諭袁臨諸郡太祖爲吳王除中書諮議復仁性率直每論事指陳無隱繇是待遇益厚從闕武昌使諭理理降還授國子助教以老賜小車宴見命坐予飲食復使諭撫廊帖木兒以翰林編修諭安南占城改翰林簡閱未幾改弘文館學士屢

名論事時操南音對上喜其質呼爲老實羅一日上
過之方巧急呼其妻設上坐燕而見上上笑曰居
甚豈所以處賢者卽日賜第城南門內尋乞致仕許
之資賜甚厚陞辭復賜大布之衣題其背曰性雖麤
率忠直可喜賜此布衣放歸田里已上念之驛召至
居三月憫其衰賜玉帶名馬錢柱杖及家僮飲食具
復遣還未幾卒上求其嗣將授以官而其從子養蒙
以疾辭養蒙隱處山林詩書自娛有從學者不拒也
于汝敬以翰林侍讀與李時勉同上書忤仁宗旨改
御史復仁有孫璋爲常州同知廬墓三年屢有祥異
江西人以

爲孝子理驚召人相持哭告之故乃銜壁肉袒出

降俯伏戰慄王挈其手曰無畏命宦者入理宮告友
諒父母府庫儲蓄悉聽取其官屬以次出城妻子資
裝得自拉召父老慰諭之饑困賑之米諸將得漢鏐
金牀王立毀之以示無所玩好民大悅乃封理歸德

侯晉才承恩侯友富歸仁侯友直懷恩伯贈友仁爲
南康王理居京師鬱鬱出怨言上以晉才適淦而投
理於高麗

張士誠小字九四泰州白駒場亭民爲鹽駟駟諸富
家數爲富家所凌弓兵義時窘辱之元順帝十三年
與其弟士義士德士信結壯士李伯昇潘原明呂珍
等十八人殺義及素所見凌富家火其舍跳入傍場
招諸少年謀起事至丁溪大姓劉子仁集衆拒之矢
中士義死士誠益決戰子仁潰遂有衆萬餘乘勝攻
陷泰元守臣李齊招撫之士誠拘焉亡何酋黨自相

殺士誠縱齊歸佯降又亡何復陷興化殺其參政璉
元使左丞僕哲篤守高郵出齊守甓社湖士誠譟入
僕哲篤出走齊還定不及遂據之僭號大周自稱誠
王改元天祐元使照磨昭招以萬戶告身不納拘之
舟中已使將而拒元軍昭大罵士誠怒高之元復使
使來士誠曰必李齊齊往下齊獄元人來攻士誠召
齊出叱之跪齊反叱曰賊余膝鐵也士誠倒曳撻之
曰子膝齋耳遂劓齊然元猶冀士誠有降意使待制
烏馬兒孫撫復往士誠復拘焉其明年陷揚州進陷
盱眙元乃使其丞相脫脫大擊之連戰旬有五日皆

士誠敗會脫脫被讒免官士誠乘隙奮擊元元兵大
北十五年畱兵高郵繇通州渡江陷元常熟十六年
攻元平江路破之路人楊椿力戰死因大劫掠轉掠
湖松常諸州時孫撫從拘謀圖士誠事泄見殺平江
者今蘇州也乃易郡隆平宮諸古剎署居省院部司
於寺觀豪門以士德爲平章陰陽人李行素爲丞相
蔣輝爲內丞相潘原明爲左丞相鎮吳興使孚伯昇
節制軍事而署周仁爲隆平太守周仁者鍛工是歲
也劉福通立韓林兒爲宋帝紀龍鳳二年歲爲丙申
高祖旣渡江稱吳公矣公有新附青軍使詹奎二將

將之士誠誘焉公使楊憲通書士誠拘之遂以舟師
攻我鎮江公使徐達固常報之我宜興與常界士誠
則來寇柵而營耿君用以鎧騰柵周人刀斫之猶戰
乃死宜興入於周其秋達與將王玉及士德戰甘露
擊走之王玉虎追士德及坎墜馬虜焉華雲龍復與
士信戰舊館周將之善禦者前雲龍斷將禦亦墜又
虜之士誠之母謂士誠曰吾聞吳公神武英謀其將
皆爲死爾殆非敵莫如降也且士德在彼士誠因請
輸歲粟二十萬石黃金五百兩白金三百斤以求士
德公責士誠歸我楊憲粟加三爲五士誠不能從乃

益兵圍達牛塘常遇春廖永安胡大海與達内外夾擊大破之擒其將德進困常城士誠遣呂珍入城守是年士誠引兵攻元杭州爲元苗將楊完者所破龍鳳三年春公命耿炳文劉成自廣德取長興周將打虎以三千人逆戰追之城西門擒其將福獲艘三百降人二百公以長興爲長安州守以炳文成而呂珍亦食盡棄常去公得常州守以湯和士誠復遣潘原明與他將再興寇長安州炳文擊之上新橋擒斬三百餘級原明遁費聚追之瑣橋又擒斬亦如之公命張鑑攻泰興擒其將文德下之六月公命常遇春吳

良致江陰士誠據秦望之山王忽雷先登奪之江陰
拔公守以良與其弟禎俞通海與趙馘以舟師入太
湖馬跡山降其將貴及津東經洞庭艤于施口呂珍
兵暴至衆欲退通海曰不可我寡以甲蒙士督戰於
舟前曰俞將軍周人疑之引去是時元苗將楊完者
亦累敗士誠也士誠畏吳躡其後詐降元輸漕粟江
浙行省左丞相達識帖睦爾表於元爲太尉四年公
命廖永安俞通海桑世傑攻江陰水將定定與其別
將瑞合世傑醉而入其軍死之永忠通海奮擊大敗
之其夏士誠遣兵寇常湯和與吳復力戰却之獲卒

三百又寇常熟廖永安大破之福山港其秋又敗之
狼山是時達識帖睦邇以楊完者恃功而驕與士誠
陰圖之完者死其苗部蔣英李祐之劉震等與桐廬
部三萬餘人來歸使李文忠往撫焉元失完者而士
誠有其杭州矣其冬復來寇常湯和擊敗之俘甲士
千人舟千艘馬千匹公則使徐達邵榮廖永安攻宜
興士誠餉宜興又不下公令西截大湖口斷其餉乃
下城之守以楊國興士誠復來寇國興力疾戰礮擊
其舟沉其人亡數士誠僅與數騎遁則復來徐達準
邵榮廖永安覆之獲其衆三千永安出擊士誠於太

湖遇呂珍獲焉公以衆三千易永安士誠不可日必
易士德士德在我鹵中陰與元合公殺之五年士誠
使其將蘇同僉寇江陰蒙衝蔽江牙於君山陣于江
壩吳良曰毋動彼衆我寡上計使其弟禎整而當北
門鋒交使王子明馳出南門擊之擒其將士二百餘
殲溺亡數是時公既有嚴婆取諸全士誠則復來侵
嚴李文忠使別將從小北門過鮑婆嶺碧溪塢迎戰
大破之復破之大浪灘復破之分水縣嶺士誠屢不
利則復侵常湯和復擊敗之吳良間道拏其援兵錫
山常州江陰者可以出京口控大江周吳所必爭地

故日相選囑而吳每敗周周用不得過江以北者吳
良也公自將取紹興守以馮國用國用卒紹興復爲
周則遣李伯昇寇婺源守將孫茂先擊敗之其夏呂
珍堰水圍諸全胡大海奪堰反灌珍珍窮蹙折矢誓
求解去許之其冬士誠以分水之敗復遣其將陸夏
二元帥花將軍據縣之新城三溪寨而遏我師元帥
何世明擊之斬陸元帥花將軍以下千餘人自是士
誠不敢窺嚴婺是歲元大饑徵士誠漕粟賜之御酒
龍衣使方國珍具漕船士誠欲背之參軍俞思齊曰
向時作賊猶可今稱臣尚可乎士誠怒抵几仆地是

時也方國珍慮士誠掣其船士誠亦慮國珍賺其粟然卒輸元六年漢友諒與士誠約從寇我建康士誠不敢從而使其將李濟據濠州公曰濠吾土也吾有國無家卽欲取之劉基勸公先伐漢於是士誠闢土加廣南自紹興北踰江淮至于濟寧矣七年公征漢江州士誠遣李伯昇以十萬兵寇長安州陳德華高費聚皆來援伯昇夜至劫其營諸軍潰劉成死之獨耿炳文嬰城守伯昇爲城車舉石填塹造火船焚水關攻益急公聞遣常遇春自江州來抹伯昇遁炳文從城中出合擊之俘斬五千八年春李文忠所受降

苗部蔣英李佑之劉震等叛於處金華刺殺胡大海
耿再成遂據處士誠聞亂使士信率兵十餘萬圍諸
全守將謝再興晝夜守鏖戰二旬有九日設伏敗之
士信憤益攻城城中兵少再興走嚴告急文忠文忠
曰嚴兵亦僅敵境衢信兵則方西攻漢夫兵貴虛聲
使榜境上曰按無伐徐右丞兵五萬出徽州邵平章
兵五萬出江右不日至矣周人疑呂珍方謀退舍五
里而胡德濟以信州之兵來與再興分門軍夜半鼙
食鼓出城衆亂德濟追擊大破之九年士誠遣呂珍
率二十萬衆破劉福通安豐殺之四月謝再興與周

私爲市公怒奪其軍再興懼叛降周而爲周寇東陽李文忠率精兵自嚴晝夜馳破之義烏乃與胡深復諸全並五指巖下城之公守以德濟士誠名雖臣元也然城池錢穀甲兵皆其自據及有杭元復授士信行省平章達識帖睦爾虛名而已至是令其屬頌功德求王達識帖睦爾畏之爲再三請皆不報其內史陳基謂且當需時士誠不聽竟自立易周爲吳使人數達識帖睦爾過失曰丞相非士信不可逼取其印函之嘉興而脅御史大夫普化帖木兒使請爲真王亦欲奪其印普化帖木兒怒封印庫中曰頭可斷印

不可妄得也自鴆死達識帖睦曰大夫死亦死於是士信自爲丞相當是之時浙西殷富繁盛士誠兄弟驕佚無斷政在文吏然士誠尚持重寡言爲奸士築景賢之樓開弘文之館士無賢不肖與馬居室多厭其心亦往往趨焉至士信用事疎簡舊將所用爲府中參軍者黃敬夫蔡彥文葉德新三人皆書生耳繇是上下乖疑莫有用命吳中謠曰黃菜葉作齒頰一夜西風來乾厭士信自出將多檣蒲蹴踘擁婦女酣宴其命將將或卧不起邀官爵美田宅旣至軍亦日載妓飲博卽失地喪師士誠置不問或復用之

崑山

人郭翼言於士誠曰明公仗馬箠下婁及越數十城望風請服者非能極慮安危力足勝也人苦元政守吏貪殘日恣故率離散莫與守誠反其道休勞之率以乘時進取則霸業可成若遽宴安逸樂坐消精銳四方豪傑並起相攻明公欲閉城自守其終能乎士誠怒欲殺之士誠之妻謂士誠曰大王不用郭生之言則亦已矣何至殺之且十月士信寇長安州耿炳

文費聚擊之獲其將與祖士信怒益圍城湯和自常來與炳文合擊大敗之是年諸將奉吳公爲吳王矣明年春士誠復來寇長安州炳文連破之城下二月士誠憤諸全之敗遣李伯昇挾我叛將謝再興以二十萬師踰浦江圍新城旌旗相綴州縣官屬皆預置以來精兵數萬分屯城北迨我援道繆美應之北門

覆其先鋒斗巖下僞吳人攻西門美趨之再戰再捷
德濟曰彼賊衆母輕乞師李文忠文忠遣指揮張斌
元帥張俊出浦江爲援士誠又自以兵從桐廬遡釣
臺烏石將犯嚴文忠扼以舟帥未至十石佑見執諸
將恐文忠分署守禦自如率指揮朱亮祖而下行次
浦江令銜枚走新城明日僞吳人空壁來文忠與其
數十騎馳之身格殺數十人王英從之貫陣而入德
濟聞之鼓譟而出僞吳人自相蹈躪血殷於溪彬亮
祖擊其餘衆俘獲將士六百餘人馬三千六百餘匹
輜重鎧甲舉之數日乃盡伯昇與其五太子俱遁於

是吳王欲先取其淮東諸郡縣然後專事隆平以其
秋命中書左相國徐達平章常遇春胡廷瑞同知樞
密院馮國勝左丞華高等率馬步舟師並水陸進十
月達擊敗士誠兵軍海安壩進圍新城敗其援兵常
遇春復擊敗其李院判擒其將士五百餘人士誠恐
失泰以舟師四百出大江薄海安次范蔡港而不卽
沂上流王恐其疑我使廖永忠禦范蔡港大軍仍軍
泰泰下徐達引兵趨高郵王又恐其深入使還軍泰
以圖淮濠而命馮勝節制高郵軍於是士誠來寇宜
興使達歸援破之士誠將復以八萬兵攻安吉守將

費子賢以所部三千拒殺其梟將二人皆驚潰去是歲除日士誠以舟師數百駐君山復出兵自馬馱沙源流窺江陰其明年正月朔王親往採旣遁使康茂才出大江追之別伏一軍江陰山茂才力戰浮子門大敗其五百舟棄而登岸者伏大起擊之虜若溺無筭徐達自宜興還軍高郵拔之與茂才進破其水寨於馬螺港淮將梅思祖以淮降王按淮圖見瓠子角隘令達絕瓠子角而軍遂取興化淮地悉平而江淮行省平章韓政亦敗李濟於濠州降之於是王數士誠八罪諭告天下大舉入隆平以徐達爲大將軍常

遇春爲副將軍使先趨湖州而使李文忠趨杭華雲龍向嘉興以分其兵應遇春軍湖港口擒其將義及旺趨毗山擒其將清及海進之三里橋士誠將三其軍達率兵攻之有言曰不利遇春曰何待日敗其一軍其兩軍皆遁遂圍湖王國寶破其同僉得全等城南門士誠遣呂珍與平章朱選及其五太子出兵六萬號三十萬屯城東舊館出我師背達與遇春等陣東阡出僞吳之背夷溝堙港絕其糧道士誠身來戰皂林之野達等敗之虜其戴元帥及甲士三千餘人是爲秋八月九月士誠遣同僉徐志堅出輕舟覘東

阡會大風雨天晦遇春令勇士以划船數百突擊擒
之得衆千餘士誠復遣其右丞義規舊館將還遇春
扼義歸路士誠援以赤龍船親兵得脫則與其壻潘
元紹屯赤龍船兵於平望潛出小舟烏鎮遇春繇別
港追襲之火其平望之赤龍船而舊館援絕是役也
王銘挺戈先登於是遇春復攻義烏鎮皆敗走追破
其六寨於昇山降其二帥顧時引數舟從徐達繞昇
山僞吳之兵怠相視而笑時引壯士數人躍之僞吳
人大敗士誠急使五太子來援薛顯前奮擊其舟焚
之郭子明畏創戰又大敗吳五太子者故姓梁士誠

養子也短而悍平地決起丈餘又善沒也珍材畧敢
戰嘗廓革囊兵宵濟以襲我師每戰則輒爲歌令其
帳下及城中人歌以譟於是以舊館降矣乃徇珍湖
城下城中大震時李伯昇以司徒爲守將欲自殺左
右抱持之遂降伯昇者十八人中士誠與最密其降
也隆平之人謂之負友今蘇人呼負友者曰李司徒
也而文忠趨杭攻下其桐廬富陽餘杭杭將原明詣
款而雲龍攻嘉興亦克之十一月徐達擊走其將義
於鮎魚口康茂才持戟督軍敗之尹山橋焚其官廩
戰船千餘遂至隆平城下諸將分門軍達軍封門遇

春軍虎丘郭子興軍婁門華雲龍軍胥門湯和軍閭
門王弼軍盤門張溫軍西門康茂才軍北門耿炳文
軍城東北仇成軍城西南何文輝軍城西北刀劒林
立飛鳥爲之不下士誠閉門殊堅也達繞而鎖城屯
田贍士士誠則嬰城守達爲飛塔臨車以俯崇墉士
誠則蒙市達實大礮礮風之中人靡不死者士誠則
亦大作礮禦軍蓋我將茅成死焉吳元年圍七月矣
尚不下其六月圍益急士誠欲突圍決戰城左之陣
嚴遣其將潛出西門轉至閶門將奔遇春營遇春與
戰未決士誠遣將將兵千餘助戰而自出山塘道狹

麾其軍少却遇春撫王弼背曰足下猛取彼弼曰諾
決而鼓二刀遇春靡之以其軍吳人擠於沙盆之潭
可量也士誠故有勇勝軍號十條龍常銀鎧錦衣出
入陣中是日皆溺死士誠馬驚亦溺肩輿馳入郭忽
忽無所出李伯昇使客往說曰臣欲爲公言興亡之
計士誠曰何如客曰公知天數乎昔項羽喑鳴叱咤
百戰百勝天下卒屬漢者何也天也公初入高郵十
八人耳而元兵圍公百萬然公卒提孤軍突出東據
三吳今既有地千里甲士數百萬而反不能敵建康
此亦天爾然令公當時不忘高郵之危苦志勞心亦

可以強今至於此臣恐公之爲項氏也士誠曰足下
嚮者不言今何及矣客曰公子弟親戚將帥羅列內
外歌妓舞女旦夕酣飲提兵者自以爲韓白謀畫者
自以爲蕭曹此時公深居於內雖有敗失掩不以聞
卽聞亦置不當罪當此之時臣言固不得聞也士誠
喟然嘆曰吾亦恨之無及矣客曰臣能及之士誠曰
不過死耳客曰死而有利則爲之不然自苦耳公不
見陳友諒乎跨有荆楚兵甲百萬建康之兵戰于姑
熟鏖於鄱陽友諒舉火欲燒其船天反風焚之兵敗
身喪何者天也人亦無如天何今攻公益急公恃湖

州援則湖州失特嘉興援則嘉興失特杭州援則杭州失區區守此誓以死拒何見晚也且夫公地譬之博者得而失之何損於初公何不以此時馳一介使自述所以歸義拯民之意幅巾待命當亦不失萬戶侯士誠仰首良久曰足下且休吾熟思之壬子復粹出胥門索戰甚銳遇春禦之少却士信幙城樓督戰見士疲忽鳴金收軍遇春因奮擊大破之追至城下復壘而迫其城士信方據銀椅與其下會食進桃未嘗噉碎士信首莫天祐者無錫之力人也楊茂莫將之善游者也天祐使茂游而通士誠達獲焉與之賞

盡得其游書知其城中木石俱盡令軍中屋木芭竹
蔽而攻城擊其盤門益急九月破其封門遇春亦破
閬門遂進薄城下其樞密唐傑登城拒戰知不敵降
日晡城破士誠更收餘兵二三萬身戰萬壽寺東街
復敗從數騎倉皇歸曰恨不從先母言顧其妻曰我
死汝奈何妻曰不獨生與其乳媼金出亡其二幼兒
驅妾媵上樓焚之而自經死士誠獨坐室中左右皆
散方亦欲自經達使伯昇往諭伯昇驚前抱持之曰
九四英雄患無身耳昇士誠舊盾上途易以故闔至
達舟中凡獲其官屬二十餘萬始士誠累表莫天祐

於元授同僉樞密院事以守無錫至是尚未降州人
張翼率父老入語張氏縛矣公守爲誰天祐擲帽於
地曰誰不如降也遂亦降達以士誠及其僞將相併
元宗室九人送建康士誠舟中閉目倘餓比至王問
之士誠曰天日照公不照我遂自經死王命剗三參
軍藁於旗竿之首府隆平曰蘇州太祖既有天下怒
蘇久不下故困以重賦久之微行過一嫗坐嫗榻移
時汎問曰嫗何自曰自蘇來僦廬曰張士誠何如嫗
曰張王乎輕財好施是德蘇太祖乃喜蘇人易恩耳
久之賦悉減

名山藏卷之四十五

晉江何喬遠 撰

天啟記下

方真故國珍也名珍以字行高祖既定天下來歸避
御諱改曰真字谷貞云國珍者台黃巖楊嶼人長身
黑面體白如瓠元末童謠云楊嶼青出海精楊嶼海
中童山也國珍生而山榮國珍兄國璋弟國瑛國瑛
凡四人又有從子明善皆膂力善馳跳驟馬故海上
鹽徒與蔡亂頭爲怨家官弗問其曲直亂頭入海行
劫元懸格捕之國珍率千人捕應格賞不及曰獨蔡

能變耶黃巖人尊上田主國珍父尤柔良爲田戶事
主甚恭田主數侵蝕之國珍謂父曰田主亦人爾阿
爺何乃恭父曰我與爾所衣食也父沒田主來索租
其欲侵蝕如故國珍具美醢盛簋醉死之醢而匿於
瓮久之泄州太守使捕之國珍方食左舉几自遮右
持門關格殺捕者遂亡命海上爲元海運苦順帝八
年也元使江浙參政朶兒只班往捕國珍執之迫爲
請招撫許之授國珍海運假千戶竟聚兵不解轉攻
溫焚畧海上州縣元將孛羅帖木兒擊之國珍夜率
勁卒火之大圍之孛執孛羅帖木兒及其郝萬戶復

道請招撫元授國珍千戶爲真官其兄弟子姪籍所部精兵三千餉之借其力以防海運國珍登岸羅拜還止故里順帝十二年汝潁兵起元募浙船北守大江國珍曰是且及我復聚衆入海元將泰不華與戰澄江潰而薄其舟手刃其數人遂爲國珍所殺是時南北諸郡豪傑所在響應元復使使卽拜國珍徽州路治中國珉廣德路治中國瑛信州路治中國珍使盜待使者於隘殺之元復招拜爲海漕萬戶國珉衢州路總管始受命張士誠據姑蘇常湖等郡元欲借其力以禦之授國珍江浙行省平章累進左丞相國

璋等各超拜有差國珍爲元十敗士誠崑山士誠大
畏稱臣歲輸粟元多國珍功命以節鉞鎮浙東開治
慶元兼領溫台金三郡國珍以國璋國珉居台明善
居溫畱國珉自副初國珍之起也瀕海豪傑莫不爲
元募誅應購而其臺省當路非數千緡不與上功至
有一門戮力幾盡竟上蒙不得武功爵而國珍亟反
亟撫再三拜已至丞相猶施然不得其心元以購功
懸賞不信於天下馴至於亡順帝十九年吳公征下
婺衢處諸郡使典籤劉辰往說國珍與其下謀曰元
運垂盡羣雄皆作今江左兵精甚所至無堅城與我

角者西有張士誠南有陳友定若陽順之以觀其變其亦可也乃使使奉書獻黃金五十斤白金百斤金織文綺百端願合力攻士誠許之使其子亞關入質公曰凡質疑也不疑胡質厚賜遣之國珍復納三郡籍願輸金助軍守土如錢鏐故事事定卽以獻許之其時閩尚未屬公示必有授國珍福建等處行中書省平章其三弟皆有官國珍使國珉領樞密署事自稱疾受印而已又歲爲元轉致士誠所輸粟元累加太尉江浙行省左丞相賜爵衢國公國璋國珉國瑛明善皆行省平章亡何苗將劉震蔣英叛我婺州殺

首帥胡大海持大海頭往見國珍其下皆賀國珍不
許曰吾故言江左如錢鏐卽出師助擊之國璋中流
矢沒然其不歸三郡如故公欲徵之國珍報曰三郡
在也惟是尚界元吳公亦未便守之公若克杭撤吳
之蔽三郡歸公是我代公守也吳元年高帝爲吳王
李文忠下杭國珍又北通撫廓帖木兒南交陳友定
觀望持兩端吳王怒使徵糧二十三萬曰克杭有日
矣公何負成約如故張士誠與公接壤取公振落耳
所不敢者以誰在耶吾旦暮下姑蘇奄至公境倍城
一戰亦丈夫矣不然去之入海亦一策也然自古未

有久海上者公審思之國珍懼與其弟姪將佐謀郎
中張本仁曰江左方圖張氏勝負未可知計不能越
境而致於人劉席曰江左多步騎平地用耳奈吾海
舟何丘楠曰二者皆非主所自福也惟智可以決事
惟信可以守國惟直可以用兵昔者江淮之間豪傑
並起人人莫不欲帝然分鼎足者漢與二吳耳漢人
敢戰不怯尚死九江張吳區區如竇中鼠敗可知也
江左之吳法嚴而軍威諸將所過秋毫無犯所得府
庫還封識之以奉其主弔伐之心此必有天下且業
已并漢勢有張氏之二公經營浙東十餘年矣不能

越三郡不以此時早決不可謂智自居錢鏐抑又背
焉不可謂信我之不信彼徵師焉不可謂直莫若與
也國珍不能用其九月吳王命參政朱亮祖率浙東
水陸二軍往擊之其時張士誠亡矣亮祖遣裨將嚴
德至新昌攻其開嶺平之進擊國瑛台州德戰死亮
祖急攻其城國瑛夜走黃巖入之遂徇下僊居諸縣
轉迨至黃巖國瑛燒解宇民舍入海其將介兒魯出
降十月復命御史大夫湯和爲征南將軍僉大都督
府事吳禎爲副將軍擊國珍慶元而亮祖復自黃巖
至溫陣城南七里明善出戰潰還奔入城亮祖與裨

將張浚湯克明徐秀柴虎克之明善已先挈妻子入
樂清遂分兵徇降瑞安十一月亮祖襲敗明善於樂
清之盤嶼追至楚門而征南將軍和副將軍禎亦自
紹興渡曹娥江降餘姚上虞二縣進擊慶元至城下
國珍載寶貨子女亡海上追擊之大敗還師徇下溫
台諸縣而王復命中書平章廖永忠爲征南副將軍
從海道會和國珍諸將較皆叛散乃使國珉遣其子
明完明則籍所部吏士船馬資糧以降明完亞關也
而國珍亦與明善出降亮祖於黃巖其臣詹鼎爲草
降表詞辯而恭吳王讀表曰孰謂方氏無人耶趣國

珍入既見讓曰公胡反覆陰陽勞我戎師耶顧實公

左右舞小智教公公不能自裁耳乃悉召其臣赦楠

以爲韶州同知又知草表出鼎手亦命官之其餘盡

徙濠州

詹鼎字國器寧海人其父餅師也鼎好學兒時讀書餅竈下讀甚富又精治春秋試不遇

國珍聞其才以計得之以爲府都事國珍弟平章事

有人犯法屢鼎治鼎論如法平章之妻受賕請于鼎

持不可曰今方氏欲舉大謀當用天下賢士一心守

法奈何使婦人預事耶妻怒詣鼎繫獄久之出爲上

虞判上虞與張士誠壤相錯軍吏貴臣甚衆以鼎儒

生也相違約鼎立衆于庭引一驛丞數以不奉公斬

之在庭皆股栗膝行請罪膝屈久不能起自後雖元

帥萬夫長皆長跪白事不敢舉目視國珍降上召見

鼎鼎爲書萬餘言須駕出上之上爲立馬受讀付丞

相楊憲官之憲惡鼎言事謂鼎徒人也竟徙梁又徙

陝憲敗大臣薦鼎于朝至京師丞相召見鼎鬚髯甚

美又能爲梁趙間言步趨進退甚都雅丞相曰魯鼎

尚書才也待半年除畱守都衛經歷改刑部郎中罪人當分覆者皆願得鼎會大都督府受賂除軍吏事發誣鼎有贓鼎不能自白御史卒誅鼎與百餘人皆死鼎爲文章氣餒迫古人守身廉重行義自陝入京師時聞人有好書價金一斤無所得金解乘驢易之上卒厚遇國珍賜第京師宴位功臣次未幾授廣西行省左丞奉朝請而已一日侍宴坐不能興昇歸上官其二子曰令國珍見也國珍卒年五十六其始起至降凡十八年本無學術所用書佐參謀繇胥史進皆苟利無遠略其兄弟子惟明善頗順理他皆圖貲自營一時政令租稅任意爲輕重民有死罪不刑納之曲蘆而投之湍云

明玉珍一名旻隨州人世爲農身長八尺目有重瞳

子剛直素信其鄉里人元順帝十一年汝潁兵起隨人相結屯青山推爲屯長已歸徐壽輝漢陽授元帥鎮沔與元丞相哈林禿戰矢中右目人號旻眼子十四年沔饑玉珍以兵千人槩斗船五十泝夔爲沔買糧至巫峽人多就之者青巾盜李喜聚衆苦蜀元將楊漢以兵五千禦之屯平西其右丞相完者都鎮重慶置酒飲漢欲殺之漢覺脫身走漢兵怒皆拏船去出巫峽羣訟之玉珍且曰重慶一城兩丞相左哈林禿右完者都兩不相下郡無厚兵可攻也玉珍猶豫未決其萬戶戴壽曰公鎮沔救困民也買糧巫峽開

亦救困民也平西衆亡其主帥發憤訟公此亦困而
可救公何不中分舟載糧還沔以其半因平西兵攻
重慶事濟爲之不濟則歸無損也玉珍用其策襲破
重慶生致哈林禿完者都夜遁果州父老迎入城止
殺禁掠皆大喜壽輝以爲隴西右丞久之完者都與
參政趙資平章朗革反復自果州至屯嘉定之大佛
寺玉珍使部將萬勝禦之勝使陳夜眠夜緣嘉定城
以入完者都朗革反遁獨資守大佛未下勝獲資妻
執示之江岸資用强弩射殺之曰汝不見平章婦平
章婦者朗革反妻也城陷赴水死已欲射殺其子衆

擁之不得相持半載餘玉珍以兵繼之大佛陷資復
與完者都朗革歹會龍州圖興復復爲重慶所執見
玉珍不屈死蜀人謂之三忠玉珍憐而禮葬之初玉
珍攻完者都時道出瀘暮宿瀘河下部將劉澤民曰
此間有隱進士劉禎公盍見焉玉珍往見喜曰吾孔
明也卽舟中拜爲理問官先一夕禎夢冕旒者造廬
則玉珍云久之陳友諒殺壽輝自立玉珍怒曰友諒
與我比肩事漢陽今如此使其將守夔不與通祀壽
輝廟之衆推玉珍爲隴蜀王玉珍不從禎屏人說曰
西蜀形勝之地東有瞿塘北有劔門沃野千里自青

巾苦蜀明公撫養而安全之民心之歸天命可知且
明公旣絕友諒必不能臣之若不稱大號以繫人心
是軍士皆四方之人或思其鄉土而去孰守取哉弗
聽明日又言玉珍乃以元二十二年春三月戊辰卽
位於重慶號國大夏紀元天統立妻彭爲后子昇皇
太子倣周制設六卿內置國子監教公卿子外置提
舉司教生徒府置刺史州曰守縣曰令去釋老二教
賦稅十取一農無征置雅樂立郊社皆禩爲也乃命
萬勝鄒興攻雲南興元巴州皆有之元陝西行省參
政車力帖木兒擊敗玉珍兵金馬山擒玉珍弟明二

王珍愛萬勝勇妻之以二妻呼曰明三已更立中書省樞密院戴壽爲左丞相明三爲右丞相向大亨張文炳爲都察二院分境內爲八使其臣鎮守屯積以贍士元二十五年高帝稱吳王二年矣使使約王珍爲與國王珍使其參政儼答聘王珍再使明三取雲南失利諸將往往暴掠不能制居夏五年卒年三十六子昇襲位方十歲改元開熙尊彭爲皇太后是爲元二十六年久之明三與張文炳有郤文炳使王珍義子明昭矯后旨縊殺之國人不服平章吳友仁興兵討昭昇命戴壽禦之友仁曰昭不誅國必不安若

朝誅昭友仁當夕解乃誅昭明三夏氏驍將也兵無
不一當百明三死夏以不競其年昇遣使來貢吳王
使御史哲報聘吳王有天下改元洪武二年使求大
木昇亦來荅貢其冬遣楊璟招諭之其臣各雌黃璟
還爲書曉之曰古者同力度德同德度義無可度焉
則爲順圖故能兩全身家流譽亡窮足下幼襲先業
不容至計徒取裁左右謂瞿塘劍閣一夫負戈萬卒
誰何此皆不達時變相謬誤何則蜀之最霸莫如劉
備諸葛孔明佐之兵食不足取之南蠻然董董能自
保足下疆場南不過播州北不越興元以陡絕一隅

之地延須臾之命可謂智乎皇帝威武神聖有順必
賞無負不夷特念足下先人故不忍加師又意足下
冲幼未嘗恐惑於左右者之說故使璟面諭禍福深
仁至恩可不知乎夫漢友諒吳士誠皆以英傑之姿
割吳劃楚造舟塞江河積糧比山嶽自謂強將勁兵
然鄱陽一戰友諒授首平江再困張氏面縛友諒于
理竄歸江夏窮迫出降然皇帝卒矜而赦之封以侯
爵今足下母論二君且亦自貶何如理耳宜幡然獨
斷自求多福不然王師一至所爲足下謀者各自爲
計足下奉老母安歸乎足下卽冲幼不嘗當亦痛心

老母逾順之圖度之而已昇不能從三年大將軍達
還自西安遣裨將金興旺張龍繇鳳翔轉攻興元克
之其秋吳友仁復來寇興旺中流矢猶戰達援以定
西兵屯益門使傅友德趨黑龍江夜襲木槽關下斗
山令其軍登山焚炬友仁夜驚遁去四年春正月高
帝以中山侯和爲征西將軍江夏侯德興爲左副將
軍德慶侯永忠爲右副將軍暨營陽侯璟都督僉事
昇率舟師繇瞿塘趨重慶潁川侯友德爲征虜前將
軍濟寧侯時爲左副將軍暨都督僉事文輝率步騎
繇秦隴趨成都命衛國公愈往襄陽餉之密諭友德

曰夏人聞吾西伐必悉銳守險東扼瞿塘北阻金牛
若出不意直擣階文門戶旣墮腹心潰矣閏三月湯
和廖永忠往取歸州江漲次夔之大溪環引兵出溪
口將進瞿塘莫仁壽守瞿塘以鐵鐳關關戴壽鄒興
飛天張益兵鑿兩崖引纜爲飛橋砲石竿鑊匝兩岸
環戰弗利引還和永忠欲稍待秋水落乃進友德則
直馳入陝揚言曰出金牛引精騎五千趨陳倉緣山
晝夜行入階克之擊敗其守將丁世真生擒其將雙
刀王十八人而湯和攻歸亦克之友德進至文蜀人
斷白龍江橋葺而濟至五里關丁世真復來拒戰汪

興祖死之友德奮戰破文遂克隆狗下江油彰明二縣趨綿遣藍玉夜襲綿壘自後乘之時向大亨守綿走保漢友德造舟以渡漢江種木筏數千大墨曰某日克階某日克文浮瞿塘之湍放之湯和向大亨悉兵漢城下友德遣驍將擊敗之戴亨與吳友仁自瞿塘來援復敗之遂拔漢壽大亨走成都陳德追擊又敗之友仁走古城友德又敗之高帝手詔責和曰皇帝問征西將軍傅將軍冒險深入克階文諸州次於平川乘勝之機正在今日將軍當水陸夾攻使夏人首尾受敵乃頓師溪口俟水落將軍欲辨象馬乎皇

帝問將軍前與將軍言不記憶何怯也會漢江之夜
浮湍下永忠乃自鹽山伐木開道繇紙坊溪趨夔與
鄒興戰大敗之進兵瞿塘鐵鐳飛橋亘關口不能舟
永忠選壯士數百衣莎衣雜卉自葦舁小舟持餽糧
水筒踰山度關出其上流度已至夜出精兵黑葉渡
皆以鐵裹頭置火鎗火砲黎明與蜀人戰上流之舟
鼓而下下流之師火而上夾擊大破之鄒興中砲死
焚其飛橋鐳若冶也擒其將八十餘人斬首以千餘
級飛天張鐵頭張皆遁去遂入夔永忠乃與和分率
水陸軍會重慶而丁世真復來陷文文州將朱顯忠

悉兵拒戰死之千戶王均諒被執不屈蜀人磔之文
東門六月丙申永忠抵重慶次銅鑼峽夏人大懼或
勸昇奔成都彭氏泣曰今大軍勢如破竹守必不支
若使天統之君薦其血腥以比於蒲卑開明妾母子
毋久苦蜀人也昇乃詣軍納款永忠曰征西將軍未
至癸卯將軍至受之送昇并降表於京師七月友德
圍成都戴壽向大亨驅象戰前鋒弩射之象反蹂壽
兵友德亦中流矢已聞昇降乃降戴壽向大亨鄒興
莫仁壽劉仁丁世真皆玉珍謀勇臣而夜眼陳飛天
張鐵頭張雙刀王盡驍將也壽大亨仁壽旣降至夔

峽皆鑿舟自沉死世真復集其餘黨寇秦州守將潘基固守五旬餘擊走之世真敗夜宿梓潼廟爲其下所殺下赴京師自言帝曰殺上非義不予賞友仁據保寧不下最後江夏侯乃下之明昇至京師高帝詔議受降禮省部上言宋乾德三年蜀主孟昶降請考故事雜定其儀儀具有叩頭伏地待罪禮帝曰昶奢淫自恣昇幼孽自臣下可免其叩頭伏地八月乙丑率官屬見封歸義侯賜冠帶衣服第宅於京師昇之降也獻良馬十其一正白身長十一尺首高九尺足七尺項有肉隱起厚五寸廣三寸貫膺終腹人立而

嘶不可駕帝撰祝策詔有司祀焉祖馴乘之夕月清
涼山名曰飛越峯圖形焉帝終召彭氏入宮授昇與
陳理於高麗也昇德性雅純通論語孝經


陳友定一名有定字安國世福清人少孤病頭瘡走
之汀清流傭於富室羅氏友定雖病頭顧魁岸有志
畧入山與羣兒樵常設隊伍爲戲羅奇之將以爲壻
羅氏媼不悅曰頭病郎足女耶因失驚而奔於隣舍
王氏之門其家夢虎踞門待友定大喜召飲食乞於
羅媼竟壻之俾習商販善敗大困充明溪驛卒至正
壬辰歲所在盜起汀州判蔡公安募民兵爲守友定

見緩頰談軍事公安奇之授黃土寨巡簡令統所募兵從福建僉都元帥吳按灘不花討平延建邵諸山賊遷清流簿尋爲令已亥歲陳友諒遣其將康泰取邵武邵克明攻汀轉掠延平將樂諸處元行省授友定汀州路總管禦之戰黃土盡獲其部將遷行省參政辛丑克明復來寇復敗之遂開省于汀友定於是右據閩之志威迫行省平章燕只不花所收復郡縣倉庫盡取之臣妾其官僚不從者竄戮焉太祖旣滅友諒圍熊天瑞贛州使朱亮祖取元浦城建陽崇安諸縣友定因數寇浙東邊胡深爲浙東行省郎中伐

其建寧友定約建寧守將阮德柔擊敗深殺之是爲
甲辰歲明年元論友定功遷行省平章友定有勝兵
萬人益發取諸郡縣遠近瓦解無敢角而長汀人羅
良者故亦以散資募士爲元捕殺漳山寇提兵解福
州圍爲閩將第一良數從海道漕元元爵良晉國公
貽友定書曰足下向爲參政國大臣汀州之復固本
職燕只平章足下僚長也足下迫之郡邑之長出自
朝命足下竄之百司朝廷之役足下臣妾之足下所
收復郡邑得其倉庫入爲家資口言爲國心實身耳
跬步之間真僞甚明不審足下將爲郭子儀抑爲曹

孟德友定大怒發兵攻漳良使三千人操弩毒矢伏
險待之千夫長石古違良節制友定兵得渡柳營江
良迎戰馬岐山敗績進圍漳良堅守旬月死之友定
據漳使人鑿山道縮城守自固戊申太祖遣將軍胡
廷美取元建寧亡何遣征南將軍湯和自明州取海
道入福州友定使其將賴正孫謝英輔鄧益等將二
萬衆守福自率精銳守延平和舟師乘風抵五虎門
擊敗元平章曲出參政袁仁夜約款明兵明入城鄧
益拒戰水部門擊殺之正孫英輔曲出皆出走參政
尹克仁赴水死行宣正院使朶耳麻不屈下獄死食

樞密院相鐵木兒居侯官曰戰守非我得爲焚其妻妾兩女而自剄和轉逼延平兵垂發會太祖使使諭降友定殺使者馭血和酒甕中盟諸將飲之亡何明兵至來水陣友定戰不利歸謂諸將明人遠鬪甚銳毋戰也徒多殺將吏吾壙山塹壑蓄犀器飽士而久之皆曰善因乘城勒吏士日夜不得番休皆怨諸將請出戰不許數請不已友定更疑其部將蕭院判劉守仁奪其兵執院判殺之守仁懼來降士卒多夜遁者圍十日會軍器局火砲發明兵疑有內應急擊之友定出省堂召英輔及參政文殊海牙與訣曰公等

善爲計吾自死元爾按劍仰藥英輔與達魯花赤白
哈麻亦具服北向自經文殊海牙及正孫降明兵昇
友定屍出值大雷雨復蘇其子海來將樂就死并俘
京師和置延平衛使部將蔡玉守之俘至皇帝問曰
元亡若爲誰守殺我胡將軍甕使者血何陸梁也雖
然降我尚官爾不降伏銅馬友定曰不降伏馬銅
馬者火馬也遂併殺海友定死其故將金子隆尚不
降復寇延平蔡玉擊敗之追至沙時沐英爲建寧衛
指揮使夾攻破之而湯和傳檄至漳元達魯花赤迭
里迷實北面再拜持斧砍印章自刎

擴廓帖木兒潁川沈丘人少育於舅察罕帖木兒遂
子焉察罕帖木兒故元別部後沈勇好義善騎射頗
有三毫怒則直指汝潁兵起江淮陷沒察罕帖木兒
率其邑子弟與羅山人李思齊擊破羅山賊數與賊
戰敗之元人義察罕帖木兒授汝寧達魯花赤是時
元天下十九陷賊察罕帖木兒提兵前後轉戰悉定
河北淮右闕陝河東地破劉福通汴梁復之鎮守黃
河義兵萬戶田豐叛降劉福通將王士誠據山東察
罕帖木兒率諸將五道下使擴廓帖木兒與其部將
關保虎林赤等戰拔其東平城諭降之元大嘉察罕

帖木兒功累遷中書平章政事兼知河南山東等處
行樞密院事陝西行御史臺中丞豐士誠既降復叛
刺殺察罕帖木兒元贈察罕帖木兒官追封潁川王
復官擴廓帖木兒使領其父兵擴廓帖木兒銜哀討
賊穴城入取豐士誠心以祭餘黨皆就擒誅元加擴
廓帖木兒銀青榮祿大夫太尉中書平章政事知樞
密院事太子詹事假便宜領父兵如故察罕帖木兒
之始起也太祖已渡江與僞漢僞吳相扼控其時勢
尚孤立使楊憲往通好元欲待太祖如方國珍故事
使戶部尚書張昶郎中馬台謀奏差張璉持御酒八

寶頂帽榮祿大夫江西等處行中書省平章政事宣
命航海以來繇國珍請見太祖畱一歲所不得見最
後繇建昌將王溥以達械裸入見賜衣冠不拜受太
祖怒命殺之皆憤罵無一言太祖陰察昶才敏夜出
當刑人爲昶與合謀璉同肆諸市以昶爲中書省都
事累遷執政賞賜甚厚而元人方謂昶死贈官賜諡
及察罕帖木兒下山東勢大振太祖復使汪河往察
罕帖木兒報書甚甘竟畱河至是擴廓帖木兒乃遣
尹煥章送河歸獻馬於太祖太祖還使河送煥章歸
報擴廓帖木兒還畱河是爲癸卯歲元順帝二十三

年也是歲元御史大夫老的沙與知樞密院事禿堅帖木兒得罪元太子奔大同孛羅帖木兒匿焉元太子必窮治之其明年孛羅帖木兒與禿堅帖木兒勒兵犯闕元太子奔太原擴廓帖木兒從之太祖復使錢禎通書欲助攻孛羅帖木兒擴廓帖木兒復留禎其明年擴廓帖木兒擣孛羅帖木兒大同從元太子趨京師元順帝使人刺殺孛羅帖木兒擴廓帖木兒扈從太子還朝元拜擴廓帖木兒左丞相擴廓帖木兒兒請南還視師是時太祖已平漢武昌有元襄陽安陸而夏明昇據有川蜀擴廓帖木兒使人攻景陵掠

汙陽遣其將忻都竹昌深入淮地於是元太子請出
師南行爲恢復江淮川蜀計元順帝難之封擴廓帖
木兒河南王總天下兵代太子行而李思齊亦在節
制中思齊自謂故擴廓帖木兒父行與他將張良弼
孔興悅列伯等皆欲異軍思齊遂據盩厔而良弼據
鹿臺擴廓帖木兒遣關保虎林赤攻鹿臺李思齊孔
興悅列伯皆與良弼合元數趣擴廓帖木兒出師擴
廓帖木兒第遣其弟脫因帖木兒及部將完哲額高
往山東而自與思齊良弼相攻一歲餘元下詔與和
解擴廓帖木兒殺詔使拒命是爲元順帝二十六年

是歲元將竹貞入我安豐徐達克之獲忻都竹昌與
左君弼出走擴廓帖木兒兵至徐大敗去李文忠克
杭獲元平章長壽丑的管等其明年太祖資遣長壽
丑的管等還曰此皆元故大臣而張昶心念失節快
快陰寓表於元太祖怒誅之碎其骨於水是爲吳元
年元順帝之二十七年也是年太祖滅僞吳方計定
中原元命太子總天下兵馬分命擴廓帖木兒自潼
關以東肅清江淮李思齊自鳳翔以西進取巴蜀陝
西左丞禿魯張良弼孔興脫列伯等取襄樊王信固
守山東擴廓帖木兒不受詔關保貊高故察罕帖木

兒信將功最高見擴廓拒詔皆不服因共攻之元落
擴廓帖木兒太傅中書左丞相河南王如故還居河
南擴廓帖木兒退屯澤州其明年爲元順帝二十八
年太祖已定天下爲明洪武元年擴廓帖木兒遣兵
據太原元太子與關保思齊良弼諸軍夾攻澤元復
削奪擴廓帖木兒爵邑令李思齊等誅之擴廓帖木
兒退守平陽關保據澤潞二州與貊高合攻而明兵
已及河南思齊良弼乃自詣擴廓帖木兒與結好因
解兵西歸擴廓帖木兒夜掩貊高關保擒之上疏陳
罪元赦擴廓帖木兒復故官爵使出兵禦明命右丞

相也速趨山東禿魯出潼關李思齊出七盤金商圖
復汴梁然大將軍達已至通入北平元順帝夜開建
德門北禿大將軍進元都登齊化門城戮其監國宗
室太尉中書左丞相平章御史中丞以下官遣故元
尚書九住西還太原告諭擴廓帖木兒因與副將軍
遇春右副將軍宗異偏將軍和俱西副將軍至真定
其達魯花赤級納錫彰先具朝服登城西崖北面再
拜墜死遂取之右副將軍與偏將軍破碗子關下澤
趨潞擴廓帖木兒部將平章韓札兒毛義等來抹平
章楊璟與戰韓店失利右副將軍乃與偏將軍往而

元右丞王某自河中來攻潼關兵始接指揮十光持
稍大呼橫貫其陣都督僉事郭子興等乘勝擊大破
之右丞薛顯追及脫因帖木兒與詹同於石州亦破
之大將軍遂使顯與參政傅友德以鐵騎三千畧平
定州而都督同知康茂才克河中大將軍師度固關
至平定進黃次站分兵扼榆次擴廓帖木兒方將萬
騎來以攻北平大將軍謂諸將莫若直抵太原使迂
抹諸將皆曰善擴廓帖木兒聞之果自保安州還軍
鋒銳傅友德以死上五十餘騎衝卻之郭英馮高而
睎其營曰兵多而漫營大而踈此可夜劫大將軍如

其計夜劫之營中大亂擴廓帖木兒一蹶一踣踰帳
後乘驕馬從十八騎遁副將軍追至忻擴廓帖木兒
入大同是時李思齊尚據鳳翔張良弼與孔興脫列
伯等駐鹿臺以衛奉元右副將軍克猗氏進克平陽
大將軍遣指揮房貺榆次通路二年副將軍引兵至
大同其將竹貞棄城走而丞相也速以大軍方西將
萬餘騎來侵通通城中不滿千人守通者平章曹良
臣使人樹幟河舟鉦鼓相聞三十里也速驚遁良臣
出城追至薊於是大將軍與副將軍右副將軍渡河
取陝既入關良弼等皆先遁遂與郭子興擣奉元入

之改曰西安府三原尹朱春者與其妻投崖死副將
軍右副將軍進取鳳翔思齊乃有降意其養子琦與
其麾下謬爲計走入吐蕃遂率所部十餘萬奔臨洮
是時良弼尚守慶陽大將軍會諸衆議所向諸將皆
曰良弼弱於思齊慶陽易於臨洮宜先向邠取慶陽
然後從隴西攻臨洮達曰不然慶陽邑巖而士戾未
易猝拔臨洮西通番夷北界河湟得其人足備戰鬪
收其產足贍軍實莫若先以大軍蹙之諸將曰善乃
畱御史大夫湯和守營壘輜重移師趨隴下秦鞏思
齊窮蹙不能軍遂以臨洮降而顧時征蘭州亦克之

良弼懼其弟良臣驍勇善戰因委慶陽使守而自走
寧夏大將軍還入安定至會招靖寧徇下隆德度六
盤至開城守之移趨西安次海那都遣右丞顯以精
兵五千襲元豫王豫王遁還至紅城出蕭關下平涼
良弼至寧夏擴廓帖木兒執焉良臣遂以慶陽降已
而叛大將軍怒趨至涇命俞通源畧其西傅友德畧
其東陳德畧其南顧時畧其北絕精騎於援道與右
副將軍偏將軍圍之擴廓帖木兒使韓札兒破原及
涇爲援右副將軍請移軍逼驛馬關守之去慶陽三
十里而軍追札兒至邠及于宜祿是時李文忠方從

副將軍北定開平屬副將軍卒太祖因詔文忠助大將軍攻而孔興脫列伯攻大同甚急文忠中道引兵破之生擒脫列伯孔興部將亦斬興以降蓋慶陽被圍七旬餘矣數戰不利糧餉絕至合九泥噉煮死人汁元平章姚暉等知事不濟獻門納師良臣踏入井大將軍命指揮果曳出斬之而擴廓帖木兒部將賀宗哲來攻鳳翔指揮金興旺知府周煥百戶王輅等嬰城守聞良臣敗亦自六盤山引去宗哲還掠蘭大將軍使右副將軍擊走之大將軍承命班師擴廓帖木兒復合其衆數苦西北邊自謂家世封王又名王

保保云於是以兵襲蘭指揮張溫乘暮擊却之遲明
王保保知蘭兵寡圍蘭數重溫閉關不戰守鞏昌指
揮于光自鞏昌來援戰敗馬蘭灘被執至蘭城下使
呼降光大呼令堅守王保保怒殺之進攻不利懼大
將軍至亦引去初王保保之圍蘭也兵夜登城千戶
佑辭不知其下乃擊却之圍既解溫執佑欲誅焉知
事朱友聞爭曰當賊犯時將軍斬佑以徇所謂以軍
法從事今既退恐坐擅殺名溫悟杖釋之上聞嘉焉
賜友聞帛五匹三年太祖以王保保數患苦西北而
元順帝尚遲留塞外復命大將軍與左副將軍文忠

右副將軍勝左副將軍愈右副將軍和以馬步八十萬分道往征大將軍自潼關出西安擣王保保定西右副將軍出居庸窮追順帝大將軍出安定與王保保隔深溝壘沈兒峪口日數戰王保保絲間道潛劫東南壘壘驚左丞胡德濟不能軍達乃身擊之斬東南壘將較以徇明日諸將悉力戰大敗之元郝王文濟王及國公闇思孝韓札兒虎林赤等官千八百六十五人將較士卒八萬四千五百餘人悉就擒獲馬萬五千二百八十餘匹橐駝騾驢雜畜稱是王保保僅與其妻子數人走渡河得浮槎以濟遂奔和林王

保保至和林元太子復用之而李文忠師至應昌順
帝已歿太子與數十騎遁去獲其嫡孫買的里八剌
并后妃宮人保保弟金剛奴從元將速哥帖木兒與
汪興祖大戰大同北口爲興祖所獲久之大將軍復
出塞王保保悉騎卒死鬪大將軍敗歸竟不得王保
保王保保居虜中數年乃卒異時太祖宴諸將問曰
諸君度今誰爲男子者皆曰常國公太祖曰遇春耶
吾得而臣之吾終無以臣王保保竟冊其妹爲秦王
妃而李思齊降太祖以爲江西行省左丞祿京師如
方真

郎曰陳友諒銳然有霸中原之心明弑其君犯正義
矣張士誠齷齪無遠畧小惠拊循其能大乎方真首
鼠轅駒窮而歸命明玉珍去漢善守巴蜀惜其不
永不然何真之流也陳友定王保保爲元幾尺寸然
皆未見一心恭命流離靡他且夫王保保不國家之
急而先私讐使明得次第齊魯汴洛間厥後乃遁而
不南卽男子晚矣明得天下有天助哉有天助哉